

LISTOVI...

GRAČANIČKI GLASNIK
časopis za kulturnu
historiju

Broj 36, godina XVIII
novembar, 2013.

© Monos 2013

Listovi gračaničkog kalendara – od 23. 4. do 8. 11. 2013. godine

Doc. dr. Omer Hamzić

29. 4. 2013.

Sedma sjednica Općinskog vijeća Gračanica: o općinskim priznanjima (stara pjesma o devalvaciji i predlagača i prijedloga)

Odavno je to stvar sitnošićardžijske nagodbe lokalnih vladajućih političkih stranaka i političke trgovine najniže vrste koja je dovela do toga da je institucija “općinskih priznanja” postala kompromitirana do bola. Sve je zagadila politika, kao i mnogo važnije i ozbiljnije stvari u ovoj zemlji. Hele, Nacrt Odluke o dodjeli ovogodišnjih općinskih priznanja nije dobio potrebnu većinu glasova i podršku vijećnika tako da je, kako je izvijestio novinar Radio-Gračanice “ isti odbijen sa 15 glasova ZA, što nije bilo dovoljno. Na komisiji za Propise i statut je da poduzme naredne korake, iako njenom predsjedniku Hasanu Fehratoviću nije jasno šta i kako dalje.”

Ali ako je bilo “zavratove” oko općinskih priznanja, vijećnici su daleko manje pažnje posvetili mnogo ozbiljnijim pitanjima od interesa za građane ove općine. Tako su “glatko protjerana” tri izvještaja iz oblasti javnog zdravstva: JZU Dom zdravlja Gračanica, Opće bolnice Dr. Mustafa Beganović i Gradske apoteke.

Na sjednici je usvojena i Informacija o održavanju cesta i javne rasvjete u mjesnim zajednicama i Informacija o izgradnji benzinski pumpi na području naše općine.

4. 5. 2013.

U Gračanici - počelo prikazivanje filmova u 3D kino projekciji

To je svakako historijski trenutak za Gračanicu, u kojoj su se filmovi počeli prikazivati prije Drugog svjetskog rata. Kino sala BKC-a (384 mjesta bila je premalena da pri-

LISTOVI...

mi sve zainteresovane za projekciju filma "G.I. Joe". Uvođenje ove nove savremene kino opreme, svakako je pravi potez JU "Bosanski kulturni centar" i njenog direktora Nedžada Peljte.

11. - 12. 5. 2013.

**16. festival dječjeg teatra BiH u Gračani-
ci: program od 15 predstava**

Stručni žiri u sastavu: Bogdan Simić, Ljubica Ostojić i dr. Larisa Softić Gasal je nakon odgledanih 15 predstava dodijelo slijedeće nagrade i priznanja: nagrada za *prvi teatarski korak* dodijeljena je predstavi "Hoću u Kinu", OŠ "Kulin Ban" Tešanjka; nagrada za *uvjerljivost i dosljednost u realizaciji lika* dodijeljena je Zoranu Stuparu za ulogu Čiča Triše u predstavi "Doživljaj mačka Toše", Dramske radionice "Branko Ćopić" Donji Dubovnik - Krupa na Uni, Teatar "Scena" Novi Grad; nagrada za *muzički element* dodijeljena je za predstavu "Buđenje", Centra za slušnu i govornu rehabilitaciju Sarajevo i OŠ "Čengić Vila"; nagrada za *radost igre*

dodijeljena je predstavi "Maštoplov", OŠ "Hasan Kikić" i KUD "Adem Alić" Gračanica; nagrada za *originalnu ideju* dodijeljena je predstavi "Nestvarna stvarnost", Amaterskog pozorišta "Neretva" Konjic; nagrada za *uspješno uvođenje forum teatra u dječje teatarsko stvaralaštvo* dodijeljena je predstavi "Prozor", Udruženja Roma "Mladi Romi" Vitez;

Nagrada za predstavu u cjelini dodijeljena je predstavi "Buđenje", Centra za slušnu i govornu rehabilitaciju Sarajevo i OŠ "Čengić Vila".

29. 5. 2013.

Osma i deveta sjednica Općinskog vijeća: voljom vijećnika, od jedne "napravljene" dvije sjednice "u istom danu", ne radi "produktivnosti" već zbog teških nespo- razuma i kontroverzi oko reprivatizacije gračaničkih javnih preduzeća "Vodovod i kanalizacija" i "Komus"

Na osmu sjednicu nakalemljena je deveta (po završetku osme), što je manir i naših domaćih parlamenata na višim nivoima, da bi se usvojile dvije odluke: o promjeni statuta JP "Vodovod i kanalizacija" i JP "Komus", kojima bi trebalo da se "otkoči" postupak reprivatizacije ili bolje rečeno poništenja privatizacije ovih preduzeća koja je izvršena prije 12 godina. Radi se o zamršenom pravnom postupku koji je pokrenula Vlada TK - s ciljem da "sredi stanje" u ovoj oblasti i ispravi, navodno, greške koje je učinila nekada neka druga kantonalna vlada privatizujući nešto "što nije trebalo da se privatizuje". Iako su na općinskom vijeću navedene odluke nekako prošle, niko ne zna kakve će to posljedice imati na dalji razvoj ova dva za građane Gračanice vrlo važna preduzeća hoće li biti dovoljno pitke vode i hoće li imati ureda odvoz smeća), ali se pouzdano zna da će upravu nad "Vodovodom", umjesto SDP, jedna druga politička opcija



s kojom je SDP "sklopio dil", to jest tzv. parlamentarnu većinu u Općinskom vijeću nakon posljednjih lokalnih izbora.

Ako ovo sa "nakalemljenom" devetom sjednicom nije bila farsa, onda zasigurno jeste farsa "donošenje odluke o općinskim priznanjima", koja je nakon međustranačke trgovine "nasitno" definitivno dobila većinu, tako da svečana akademija povodom Dana općine neće ipak ostati bez svog "važnog" događaja – dodjele tih priznanja.

U nastavku ove (osme) sjednice, uz više sugestija i komentara usvojeni su izvještaji o radu i finansijskom poslovanju javnih preduzeća: "Komus", "Vodovod i kanalizacija" i Veterinarska stanica te izvještaji o radu Općinskog pravobranilaštva i o radu i vršenju nadzora općinskih inspekcija u 2012.

Kraća diskusija vođena je i povodom informacija o provedenim mjerama novčane podrške u poljoprivredi u 2012. godini na području općine Gračanica i o načinu odlaganja komunalnog otpada na području općine Gračanica..

29. 5. 2013.

Tarik Kamarić, vrhunski talenat klasične gitare - oduševio "svoju" publiku na koncertu u Gračanici - izvodeći djela svjetskih poznatih kompozitora i muzičara (Galerija BKC)

Rođen je 1994. godine u Gračanici, od svoje osme godine ne odvaja se od gitare. Osnovnu Muzičku školu – odsjek gitara završio je u klasi Srmena Đonlagića kao učenik generacije, nastavio je školovanje Srednjoj muzičkoj školi u Tuzli, prvo kod profesora Nedima Tinjića, a zatim u klasi Predraga Stankovića. Usavršavao je "zanat" kod svjetskih priznatih majstora gitare: Borisa Tešića, Sanela Redžića i Dejana Ivanovića. Učestvovao je i osvajao nagrade na mnogim domaćin i međuna-

rodnim muzičkim takmičenjima. Ali to je tek početak jednog mladog umjetnika, pred kojim se otvara jedna sjajna muzička karijera.

2. 6. 2013.

Dan općine Gračanica, svečana akademija i dodjela općinskih priznanja

Nakon oficijelnog referata koji je pročitao općinski načelnik Nusret Helić i prigodnog kulturno-umjetničkog programa, priznanja su dobili: Udruženje "Gračaničko keranje" i Organizacija ratnih vojnih invalida Gračanica (*zlatna plaketa*), Amel Ćurić, Sabina Hasić i Jusuf Kadić (*zlatna značka*), *počasnom građankom općine Gračanica* proglašena je Liliane Čolić. Svečanostima povodom Dana općine prisustvovali su, između ostalih I gosti iz Francuske, gradonačelnik bratskog grada Fleury-les-Aubrais Pierr Bauchet sa saradnicima i Roland Gilles, ambasador R Francuske u BiH.

2. 6. 2013.

Dan općine: Otvoren most prijateljstva preko rijeke Sokoluše u Gračanici

...u čijem je sklopu izvršena i temeljna rekonstrukcija gračaničkog skvera i još nekih dijelova saobraćajnica u toj zoni, koja predstavlja značajno saobraćajno rasterećenje i omogućava bezbjednije i funkcionalnije odvijanje saobraćaja magistralnom cestom Gračanica-Srnice u tom dijelu grada (riješeno pitanje bezbjednog skretanja u centar grada i naselje Lipa). Riječ je o zahtjevnom projektu, čiji je kreator i projektant bio inž. Amir Halilčević, a izvođač gračanička firma "Roading". Tokom gradnje trebalo je rješavati komplikovana pitanja ključnih instalacija vodovoda, centralnog grijanja i regulacije korita rijeke (u zoni mosta), što je uz loše vremenske prilike znatno usporavalo radove. Izvođač je, ipak ispoštovao rokove i

objekat predao na upotrebu prema planiranoj dinamici.

U izgradnju mosta i rekonstrukciju skvera i ostalih saobraćajnica na toj lokaciji uloženo je oko milion KM, a sredstva su obezbijedili: Općina Gračanica i Direkcija cesta Tuzlanskog kantona. Značajna donacija za izgradnju ovog mosta došla je i iz bratskog grada Fleury-les-Aubrais iz Francuske.

2. 6. 2013.

Dan općine: kamen temeljac za stambeno-poslovni objekat DD "Bosna" na lokaciji nekadašnje Robne kuće (srušene u ratu) u centru Gračanice

Više od 20 godina na toj lokaciji zjapila je "rupa", djelo srpskih "topdžija" sa Ozrena koji su jednog sumornog ratnog dana skoro do temelja razornim granatama srušili robnu kuću u strogom centru Gračanice. I kada su uklonjeni ostaci robne kuće sa tog mjesta, trebalo je dugo čekati dok se konačno nije našlo rješenje za izgradnju tog atraktivnog prostora. Gračanlije su s razlogom negodovali što se to ruglo u centru grada (kao ružna ratna uspomena) nije do sada riješilo. Za to kašnjenje bilo je više razloga—od imovinsko-pravnih i finansijskih, pa do urbanističkih kombinacija sa tim prostorom i raznih ideja: od slobodnog gračaničkog trga, pa do izgradnje "male Bašaršije" — uglavnom nerealnih.

Konačno, i pored krize koja ne ide na ruku nikakvim gradnjama, ipak su se stekli uslovi da se to krupno urbanističko pitanje u centru Gračanice definitivno i na najbolji način riješi. Kamen temeljac položen je za veći poslovno-stambeni objekat od oko 4200 m², čime se zemljište površine 1600 m² definitivno privodi namjeni u skladu sa Regulacionim planom "Centar" Gračanica. Projektom je predviđena izgradnja sljedećih sadržaja:

šetališnog dijela—trga površine oko 600 m², u suterenu—garaža sa 35 parking mjesta i pomoćnim prostorijama, prizemlje (550 m²) sa 11 poslovnih prostora u nivou trga i glavne ulice i samoposlugo, površine od oko 200m²; na prvom spratu projektovano je 10 poslovnih prostora i restoran od 200m²; na drugom spratu 11 poslovnih prostora i na trećem, na djelu zgrade od glavne ulice i pekarskog prolaza — 5 stanova.

Realizacijom ovog projekta: otvara se dalja razvojna perspektiva preduzeća "Bosna" kao investitora (oko 50 novih radnih mjesta), još kvalitetnije snabdjevanje stanovništva. Samom gradu ovaj objekat daje novi izgled i povoljniji ambijent za ukupna privredna, društvena i druga dešavanja u samom njegovom centru.

Cijena koštanja svih predviđenih radova procjenjuje se na 3.300.000,00 KM, a ukupno ulaganje oko 4 miliona KM

Izvođenje radova u prvoj fazi gradnje (grubi građevinski radovi, pokrivanje objekta), povjereno je firmi "Sagra" d.o.o Gračanica, koje ove poslove, po ugovorenoj dinamici treba da završi do kraja 2013. godine. Planirano je da objekat bude u cijelosti završen i stavljen u funkciju najkasnije u prvoj polovini 2015. godine.

26. 6. 2013.

Deseta sjednica Općinskog vijeća: o stipendijama - umjesto 80 prošle 84 ove godine

Pored odluke o dodjeli ovogodišnjih stipendija, usvojena je i nova Odluka o utvrđivanju uslova, kriterija i postupka dodjele stipendija učenicima srednjih škola i studentima, koja se, osim nekih formalnosti bitno ne razlikuje od dosadašnje.

Do kraja sjednice usvojena je Informacija o inspeksijskom nadzoru iz obla-

sti radnih odnosa, Program kapitalnih investicija općine Gračanica za period 2010.–2014. godina, Izvještaj o realizaciji programa kapitalnih investicija za 2012. godinu, Informacija o statusu projekta "Poboljšanje sistema vodosnabdijevanja i proširenja sistema kanalizacione mreže na području općine Gračanica kandidovano pri Evropskoj investicionoj banci.

28. 8. 2013.

Jedanaesta sjednica Općinskog vijeća Gračanica: Izvještaj o izvršenju Budžeta u prvom polugodištu 2013. - prihodi sa relativno malim podbačajem

Ostvareni su u iznosu od 5.176.317 KM ili 91,72 %, što je manje za oko 500.000 KM. (Porezni prihodi ostvareni su u iznosu od 3.378.384 KM ili 104,94 %, neporezni 1.115.050 KM ili 113,66 %, potpore – grantovi 428.585 KM ili 55,81 % i primici 254.298 KM ili 43,84 %). Ukupni izdaci sa otplatom duga ostvareni su u iznosu od 3.852.563 KM ili 68,27 %. Prividni suficit, prema objašnjenju općinskog načelnika, pojavio se usljed ne-realizovanih projekata i namjenskih sredstava, ali i odgovornijeg odnosa lokalne vlasti da rezerviše i sačuva sredstva za neke ugovorene projekte.

Sa ove po svemu, rutinske sjednice, osim stanja općinske kase, vrijedno je još samo spomenuti da je usvajana Odluka o podizanju spomen-obilježja poginulim borcima-šehidima u MZ Donja Orahovica (press Općine Gračanica).

31. 8. 2013.

Otvorena nova džamija u Buku, najudaljenijem selu od Gračanice

Riječ je o prvoj džamiji u ovom selu, koja je sredstvima džematlija i uz podršku brojnih donatora izgrađena na mjestu nekadašnjeg mekteba. Počevši od same inicijative, Zahvaljujući toj podršci i ak-



tivnosti Građevinskog odbora, gradnja džamije, počevši od same inicijative trajala je svega nepune dvije godine.

Prigodnim vjerskim programima i samom činu otvaranja džamije, pored mnogobrojnih vjernika ovog i susjednih sela, prisustvovali su i visoki gosti iz verskog i političkog života općine Gračanica i Tuzlanskog kantona.

30. 9. 2013.

Dvanaesta sjednica Općinskog vijeća: prvi korak ka trajnom rješavanju pitanja zbrinjavanja krupnog otpada, za volunteranje mladih sa fakultetskom diplomom 80.000 KM, povećane naknade za postavljanje i popravak podzemnih i nadzemnih instalacija na javnim površinama...

Odluka o davanju saglasnosti za učešće Općine Gračanica u izgradnji i korištenju Regionalne deponije Doboje, bez sumnje, može biti najvažnija ili jedna od najvažnijih tačaka dnevnog reda u mandatu ovog općinskog vijeća imajući u vidu da se općina Gračanica, nakon skandalozne propasti projekta regionalne deponije

Huskići (područje Lukavca), našla u skoro bezizlaznom položaju kada je u pitanju odlaganje krupnog otpada. Po nalogu nadležnih inspekcijskih organa postojeću gradsku deponiju na Grabovcu (koja je prenatrpana i u katastrofalnom stanju), trebalo je odavno zatvoriti. U kakvom bi se položaju našla Gračanica, pa i Doboju Istok, koji u tu deponiju takođe odlaže "svoje" smeće, teško je i zamisliti. "Pridruživanje" Gračanice onim općinama koje će koristiti Regionalnu deponiju Doboju predstavljala zato "historijsku" odluku, naravno pod uslovom da se gradnja te deponije završi i koristi prema utvrđenim planovima i projektima, koji će, svakako, biti podržani i iz međunarodnih fondova. Koncept Regionalne sanitarne deponije Doboju predviđa izgradnju sanitarne deponije na lokalitetu bivšeg kamenoloma u Doboju, na kojoj bi se, komunalni otpad odlagao sa područja 14 susjednih općina. Konačno je, sa velikim zakašnjenjem u odnosu na ranije godine (zbog čega su odgovorni više puta prozivani u javnosti), na dnevni red ovog Općinskog vijeća došlo i pitanje finansiranja volontera i volontiranja. Formulirano je dosta rogovatno – kao Odluka o obavljanju volonterskog rada nezaposlenih osoba visoke stručne sprema sa područja općine u organima uprave i pravnim subjektima iz javnog i privatnog sektora. Ovim aktom (koji je "potkovan" sa 80.000 KM) daje se mogućnost mladim, visokoobrazovanim osobama da steknu neophodno radno iskustvo, kao ulaznicu za eventualno zapošljavanje. Nakon provedenih procedura (putem javnog poziva i odgovarajućih kriterija), 31 lice sa visokom stručnom spremom bit će upućeno na "volontiranje" i to najviše u obrazovne, odnosno vanprivredne institucije (osnovne i srednje škole 20, Općina 3 i Centar za socijalni rad i Bosanski kulturni

centar po jedno) i svega 6 u privredu (po jedno u "Grin" i "Zeka-komerc" i po dvoje u "Variplast" i "Helioplast").

1. 10. 2013. - 15. 10. 2013.

Počeo prvi poslijeratni (historijski) popis stanovništva u BiH. Na području općine Gračanica u popisu su angažirani 241 popisivač i 32 instruktora. Prvi preliminarni rezultati popisa, objavljeni tri sedmice nakon njegovog završetka, pokazuju da na prostoru općine Gračanica živi 48.700 stanovnika, osjetno manje u odnosu na dosadašnje statističke procjene.

Prvi poslijeratni popis stanovništva u Bosni i Hercegovini obilježen je i brojnim raspravama, problemima i kontroverzama, prije svega vezanim za etničko/nacionalno izjašnjavanje. Brojne organizacije i pojedinci su mjesecima uoči popisa pokretali i vodili rasprave, a potom i prave kampanje u cilju da što veći broj stanovnika ove zemlje odbije nacionalno izjašnjavanje ("građani prije svega") ili da kao etničku oznaku upotrijebi nadnacionalnu odrednicu državljanstva (Bosanc, odnosno Bosanc i Hercegovac). S obzirom da su takvi djelovali isključivo u bošnjačkim sredinama, postalo je jasno da je njihov cilj jedino da se što manji broj Bošnjaka izjasni kao Bošnjaci. Imajući u vidu nedovoljnu nacionalnu osviještenost bošnjačke nacije (čije je profiliranje u završnoj fazi, ali ipak još uvijek nedovršeno), te zajedno sa onima koji će se "po inerciji" izjasniti kao Muslimani – a koji zbog nakaradnih propisa neće biti uvršteni među Bošnjake – objektivno je prijetila opasnost da će broj Bošnjaka u rezultatima popisa biti manji nego što pripadnika tog konstitutivnog naroda objektivno ima u Bosni i Hercegovini. Posljedice toga bi bile duboke i trajno bi se odrazile na ustavnu poziciju, udio u odlučivanju i uopće budućnost Bosne i Hercegovine.

Zbog svega toga, bošnjačke nacionalne organizacije su povele niz akcija u cilju educiranja naroda o ispravnom etničkom izjašnjavaњу na popisu. Nosilac takvih akcija na području općine Gračanica je bio Medžlis Islamske zajednice, predvođen predsjednikom dr. Admirom Brkićevićem i glavnim imamom Smajom ef. Mustafićem. Akciju su podržale skoro sve političke stranke koje djeluju na općini (uključujući SDA i SDP, kao najjače), ali i brojne nevladine organizacije i udruženja građana.

5. 10. 2013.

Održan 4. izložba stočarstva "Gračanica - Doboj Istok"-organizator ZZ "Gračanka"

Cilj izložbe je popularizacija govedarstva i razvijanja takmičarskog duha među stočarima sa ovog područja. Ove godine na stočnom sajmištu "Stankove bare" predstavilo se 38 izlagača goveda, 4 izlagača konja, ovaca kao i uzgajivači autohtonih peradi, proizvođači stočne hrane, izlagači domaćih i tipičnih proizvoda.

U programu manifestacije prikazani su: praktična priprema domaćeg pekmeza na stari način, potom demonstracija obrade papaka, proglašenje najboljih proizvođača mlijeka i vlasnika grla. Posjetioci su mogli uživati u degustacijama gotovih prehrambenih proizvoda spravljanih na domaći način po tradicionalnoj recepturi ovdašnjeg stanovništva i uvjeriti se u njihov kvalitet.

Osim velikog broja posjetilaca, veliki je broj sponzora koji su dali podršku ovogodišnjem sajmu. Osim Općine Gračanica i Doboj Istok, to su ministarstva poljoprivrede FBiH i TK, poljoprivredna udruženja, te mnogobrojne kompanije i resorne institucije.

Zemljoradnička zadruga "Gračanka" kao jedna od najboljih u svojoj branši na nivou BiH, sa ovogodišnjom proizvodnjom

i plasmanom od 3 miliona litara mlijeka, preko hiljadu tona voća i povrća, preko 1000 zadrugara i kooperanata s obje strane entitetske linije, te realizacijom od 4 miliona KM i ove godine pokazala se kao dobar organizator i domaćin manifestacije – koja, svakako, zaslužuje još veću društvenu podršku.

11. 10. 2013.

Od Gračanice do Gradačca-preko Buka i Međeđe Donje

Svečanim otvorenjem nove dionice asfaltnog puta između sela Buk, sa gračaničke i sela Međiđa Donja sa gradaččke strane općinske administrativne granice u dužini od 262 metra spojena su ne samo ova dva susjedna naselja već su i dvije susjedne općine dobile još jedan zajednički "put spajanja". Ova dionica puta i jeste rezul-



Nusret Helić, načelnik općine Gračanica i Edis Dervišević, načelnik općine Gradačac

tat zajedničkih napora i saradnje između općine Gračanica i Gradačac da se stvore bolji uslovi života na tom području. To su posebno istakli načelnici općina Nusret Helić (Gračanica) i Edis Dervišević (Gradačac) prilikom simboličnog presijecanja vrpce i otvaranja dionice puta u koju je uloženo 68.000 KM iz općinskih budžeta i dobrovoljnih priloga građana spomenutih sela. (press Općine Gračanica).

13. 10. 2013.

U gračaničkom naselju Lipa asfaltirane i rekonstruisane dvije ulice

Riječ je o jednoj ulici u mahali Drijenča u dužini od 156 i Muladedinoj ulici u dužini od 143 metra. To su manji projekti iz programa rekonstrukcije gradskih ulica, čija će se realizacija ubrzati u narednom periodu. Sredstva zu obezbijedena iz komunalnih naknada u okviru općinskog budžeta. (pres Općine Gračanica)

14. 10. 2013.

JP "Vodovod i kanalizacija" Gračanica - primjer za ugled u BiH-po efikasnoj organizaciji, kontroli gubitaka vode i upravljanju vodovodnim sistemima

To je rezultat višegodišnjih napora menadžmenta, upravljačkih struktura i svih zaposlenih da osiguraju uredno snabdijevanje pitkom vodom gračaničkih domaćinstava, javnog sektora i privrede na širem prostoru Gračanice. Radi se na planskom i kontinuiranom pronalaženju novih i potencijalnih izvorišta i istovremeno na instaliranju najmodernije elektronične opreme u cilju smanjenja gubitaka vode iz postojećih izvorišta i u postojećoj distributivnoj mreži. Zahvaljujući takvoj orijentaciji, u posljednjih nekoliko godina Gračanica, uprkos velikim sušama i teškoj hidrološkoj situaciji, nije imala redukcija vode kao većina gradova u BiH. Među posljednjim inovacijama na poboljšanju kvaliteta vodosnabdijevanja instalirani su i (danas) pušteni u pogon elektronski uređaji za telemetriju, odnosno nadzor i upravljanje vodovodnim sistemom. Radi se o unaprijeđenom sistemu nadzora distributivne mreže u cilju smanjenja gubitaka vode. Tim uređajima uvezan je i stavljen pod kontrolu kompletan postojeći vodovodni sistem, koji omogućava lociranje eventualnog problema i otklanjanje kvarova na mreži, odnosno reagovanje unutar vremenskog intervala od 24 sata.

I ove novine svrstavaju gračanički vodovod među vodeće u našoj zemlji u pogledu smanjenja gubitaka vode u mreži – koji su ovdje svedeni gotovo na minimum. (pres Općine Gračanica)

14. 10. 2010.

Hajir-česma na Ritašićima (Gračanica)

...koju je sagradio kao svoj hair Omer Barimac, svečano je predata na upotrebu mještanima ovog gračaničkog naselja. To je još jedan u nizu hajr-projekata u Gračanici, koji se realizuju zahvaljujući inicijativi i dobroj namjeri onih ljudi koji imaju želju i mogućnost da učine dobro i humano djelo za svoje sugrađane i komšije. I ova hajir-česma potvrđuje da bi sa više sistema, poticaja i pomoći od strane lokalnih vlasti ovakvih projekata na području općine moglo biti znatno više.

31. 10. 2013.

Trinaesta sjednica Općinskog vijeća: Usvojen Regulatorni plan "Centar" Gračanica

... o kojem je vođena višemjesečna javna rasprava. Ovim dokumentom omogućit će se efikasnija izgradnja i racionalnije korištenje raspoloživog građevinskog i drugog prostora u najužem centru Gračanice. Upućen je na javnu raspravu Nacrta Budžeta za 2014., te usvojeno nekoliko rutinskih odluka i rješenja, koje slabo zaokupljaju pažnju vijećnika, kao što je na primjer **Odluka o podizanju spomen-obilježja u MZ Gornji Doborovci, Rješenje o imenovanju Komisije za utvrđivanje prometne vrijednosti nepokretnosti i prava**, Politika socijalnog isključenja itd... Ali zato nije prošlo bez polemike (i konačne nagodbe) pitanje razrješenja i imenovanja predsjednika i novih članova Općinske izborne komisije, koji primaju solidnu "apanažu" i kad nisu izbori – što je uvijek iz više razloga bilo atraktivno u podjelama plijena među političkim strankama koje same sebe zovu vladajućim.